

Najib: Umno bukan parti ABC, tak gentar demokrasi
Malaysiakini.com
Disember 1, 2011
by Abdul Rahim Sabri

Umno bukan parti yang gentar terhadap demokrasi seperti tuduhan seteru politikinya, dakwa presidennya, Datuk Seri Najib Razak.

Sebaliknya, tegas beliau Umno adalah parti yang mendakap demokrasi bak kata pepatah Inggeris "the proof of pudding is in the eating" (belum tahu buruk baiknya kalau belum dicuba).

Katanya, sejak beliau mengambil tampuk pemerintahan kerajaan dan parti sejak 30 bulan lalu, beliau bersama Majlis Tertinggi Umno, Dewan Tertinggi BN mahupun kabinet mengambil keputusan untuk melaksanakan proses islah dan pembaharuan termasuk memberi lebih ramai ahli Umno hak untuk memilih pemimpin mereka.

"Kita bukan seperti pihak lawan. Contoh pertama, Parti A, jawatan ketua umum sudahlah tidak dipilih secara demokratik, lebih berkuasa pula Presiden parti.

"Contoh kedua, Parti B sebuah parti yang memakai gelar demokrasi, namun langsung tidak demokratik. Apakah demokratik namanya kalau perwakilan cawangan memilih 20 orang ahli jawatankuasa pusat dan kemudiannya ahli jawatankuasa pusat tersebut pula, memilih kepimpinan tertinggi parti? Ini jelasnya, tidak sama sekali mencerminkan kehendak ahli terbanyak," katanya.

Menurut Najib, contoh ketiga adalah parti C yang kononya memperjuangkan negara kebajikan.

"Lahawlawala... Jawatan mursyidul am pun tampaknya tidak diundi secara demokratik, tetapi ternyata lebih berkuasa dari presiden.

"Sama juga dengan parti A. Tambahan lagi parti A itu, suami, ketua umum, isteri presiden anak perempuan sulung, naib presiden, timbalan presiden pulak...hmmm...tak payahlah kita cerita," katanya sinis.

Copyright © 1999-2007 Mkini Dotcom Sdn. Bhd
<http://www.malaysiakini.com/news/182887>